

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou, ei taata maiti-mau-hia e te Atua na roto i te tohu, e te tuuraa o te rima o te feia toroa e tia'i, ia a'o i te Evanelia e ia faatere i te mau ohipa no to'na ra toroa.”

Nu. 11.

Atete, 1912.

Mat. 5.

Te Tii Rahi i Iteahia e Nebukaneza.

E TE EKALEZIA MURE ORE RA.

Daniela 2: 36-45.

EERE teie parau e pahonora a i tei neneihia i roto i te vea Katolika, i te avae ra, i Tiurai. E faaiteraa parau teie i ta matou, ta te Ekalesia a Iesu Mesia haapiiraa i te reira vahi. Aore hoi e faufaa ia pahono Te Heheuraa Apî i te vea Katolika, no te mea ua faauehia to te ekalesia Katolika, eiaha ratou e taio i te vea a te “Momoni”. Oia mau; “e fariu ê hoi to ratou tari'a i te parau mau, a opai tia'tu ai i te fabula”. Timoteo II 4:4.

Teie nei taoto maere rahi a Nebukaneza tatou e feruri, o te tuatapaparaa ia a te mau hau, mai te taime mai i horoahia teie nei orama, e tae roa'e i te faatiaraahia o te Basileia a te Atua i parauhia e Daniela. O Nebukaneza, o te upoo auro ia e te tapao no te Hau Babulonia. Ua vai taua basileia ra i te pae e te ono no te tenetere hou Iesu, oia hoi mai te matahiti 606 hou Iesu, e tae roa'e i te matahiti 533 hou Iesu.

Ua monohia te basileia Babulonia e te hau a to Medai e to Peresia, o tei faaauhia i te ouma e na rima ario ra. I te matahiti 538 hou Iesu, i tupu ai i teie nei basileia, e ua vai mana teie nei basileia, e tae roa i te matahiti 331 hou Iesu. Ei taua matahiti ra ua haamouhia teie basileia, e ua monohia e te hau Makedonia, oia hoi te hau Heleni.

Te opu e te humaha veo e tapao ia no te hau Makedonia. Ua vai mana teie nei basileia mai te matahiti 331 hou Iesu, e tae roa i te matahiti 161 hou Iesu, ei reira ua vî ratou i to Roma. O Alezanedera Nui te arii tuiroo no taua basileia Heleni, "O'na avae ra e auri ia", o te tapao ia no te Hau o tei haamou i te mau basileia ra e ua vai mana taua basileia e tae roa i te hopea o te maha o te tenetere i muri iho i te Mesia ra. O te hoê ia tapao no te maha ra o te basileia o to'na etaeta mai te auri. O Kaisara Augusto te arii tuiroo rahi no te basileia Roma. "Te tapuae e te manimani, e araea potera e tahi pae, e auri hoi e tahi pae, e amaha ia taua basileia ra". Dan. 2:41. E tapao ia teie no te mau basileia tei mono ia Roma, e te vai noa ra taua mau basileia i Europa i teie nei. E tahi pae o taua mau basileia e mau basileia etaeta roa mai te auri te huru, e tahi pae mea paruparu mai te araea potera te huru, e aita hoi ratou i ati maitai e tahi i e tahi.

Te tamata noa teie nei mau basileia ia piri te tahi i te tahi ia tauturuhia ratou i to ratou mau peapea e to ratou mau tama'i te tahi i te tahi. Te faaipoipo nei te hui arii no te tahi basileia i te hui arii no te tahi atu basileia, e e fetii ana'e ratou i teie nei, aita râ ratou i ati maitai te tahi i te tahi. Eita e tia ia mana'o e ati maitai ratou te tahi i te tahi, no te mea te haapii papu mai te parau tohu e ore roa ratou e na reira.

Ua na ô maira Daniela: "Ia tae i te anotau o taua mau arii ra e faatupu te Atua o te ra'i ra i te hoê basileia o te ore ia e mou, e ore hoi e riro ia vetahi ê, e hope roa hoi taua mau basileia ra i te pârârî e e pau, e vai tera e a muri noa'tu".

Ua tupu anei teie mau arii i parauhia i roto i teie nei irava i te tau a te Mesia e ta'na mau Aposetolo ra. Aita ia; aita hoi teie nei mau arii i tupu i te tau a Iesu e ta'na mau Aposetolo, e hoê noa iho arii i reira, o Kaisara Augusto ra. A hio i te Luka 2: 1. e i te Apokalupo 17: 12.

Ua faatupu anei o Iesu i ta'na basileia i te tau no Kaisara Augusto ra? E; ua faatupu hoi o Iesu i ta'na basileia i te tau no Kaisara Augusto ra. A hi'o na i te Luka 17:21. Eaha ta Iesu i parau mai no taua basileia ta'na i faatupu ra? Ua parau maira Oia e, e hopoi-ê-hia taua basileia ta'na i faatupu ra, e e horoa i te hoê nunaa ê, ei faahotu mai i te huero ra.

“E teie nei, e parau atu vau ia outou, e hopoi-ê-hia te basileia o te Atua nei ia outou, e e tuuhia'tu i te nunaa e faahotu mai i te huero ra”. Mataio 21:43. A hi'o atoa outou i te Ohipa 13:44, 45, 46; e te 28:28; e te 18: 4, 5, 6.


I te faatupuraa o Iesu i ta'na basileia, ua tupu anei te tohu a Daniela i reira? Aita ia i tupu te tohu a Daniela i te faatupuraa o Iesu i ta'na basileia i te hoê ahuru e ma iva o te tenetere i mairi a'enei no te mea ua parau mai Daniela “aore hoi e riro ia vetahi ê”. Ua parau râ o Iesu i ta'na i faatupu ra, e hopoi-ê-hia i te nunaa ê; e i te reira ua riro ia vetahi ê ta'na basileia.

Ahiri ua tupu te tohu a Daniela i te anotau a te Mesia, eaha te feia Kerisetiano e pure noa i teie nei i te pure ta Iesu i haapii mai o tei na ô maira e, “E to matou Metua i te ao ra ia raa to oe i'oa. *Ia tae to oe ra hau.* Ia haapaohia to oe hinaaro i te fenua nei, mai tei te ao atoa na, etc.” Eaha; te pure noa nei anei te taata ia roaa ia'na tei roaa na ia'na?

Te faaite atu nei matou e, i te anotau o taua mau arii i parauhia e Daniela, oia hoi i to tatou iho tau nei, e faatupu te Atua no te ra'i i ta'na Basileia ra. O te ofai i ootihia, o te Ekalesia a Iesu Mesia, o tei faatupuhia i te 6 no Eperera, i te matahiti 1830. Te faaite atoa'tu nei matou, ua tae mau te melahi i iteahia e Ioane. e ua faaho'ihia mai te Evanelia e tia

i te vairaa. A haamana'o outou, o tei taio i teie parau, ia porohia teie Evanelia i faaho'ihia i te mau fenua atoa, e i te mau re'o atoa, e i te mau nunaa atoa e tia'i. E tapao teie, aore roa te Evanelia mau i te ao nei. Apo. 14: 6. I te ano-tau tahito, ua na ô maira Iehova, na roto i te vaha o to'na tavini, o Amosa, "Te fatata maira te tau e hopoi atu ai au i te o'e i nia i te fenua, e ere râ i te o'e maa ore, e te hiaai i te pape, i te faaroo râ i te parau a Iehova, Amosa 8: 11. Ua au roa teie parau a Iehova, ta Amosa i tohu ê na, i ta Ioane i ite, oia hoi aore te Evanelia mau i te ao nei.

—FARANI FULUMARE.



O IERUSALEMA, I ITEAHIA MAI, NO NIA MAI TE MOU'A RA,
O OLIVETA.

Te tapao A, e faaiteraa ia i te Fare Pure rahi i Ierusalema.
Te tapao B, o te Uputa Auro. Te tapao C, o te area no te Hiero.
Te tapao D, o te uputa ia, o Setephano.

Te Parau Tuatapapa no
Iosepha Semita.

(TUATIRAA.)

PENE XXII.

MATAHITI 1834-36.

Te tupuraa o te ite no te Peropheta i te rahiraa. Te mau orama hanahana rahi i roto i te hiero. Te haamaitairaa i te hiero. Te horoaraa mai i te mau taviri no te anotau hopea nei. Te haere atura te mau Peresibutero e poro haere i te Evanelia.

I A haamata Iosepha i te iritiraa i te Buka a Moromona, aita ona i ite maitai i te parau tei roto i te mau buka o te ao nei. Ua rave ona i te ohipa i nia i te faaapu e i roto i te uru raau, e aita ona i parahi i rotopu i te feia paari, e te maramarama, area râ ia haamata ona i te rave i te ohipa na te Fatu, ua tupu oioi to'na ite i te rahiraa.

A iriti ai Iosepha i te Buka a Moromona, te parahi atura oia i roto i te hoê haapiiraa maitai roa, e ua haamaramama mai te Varua Maitai i to'na mana'o, e taio atura oia, e haroaroa i te hoê re'o ê roa i to'na iho. Ia oti roa teie nei ohipa ia'na, ua hau to'na ite i te re'o Aiphiti i to te taata'toa ra, e ua rahi atoa to'na ite i te re'o Beritani, e na taua ohipa ra i faatupu i te hinaaro puai i roto i to'na aau ia noaa i te ite rahi. Ia papai faahou oia i te bibilia, e ia oti roa ia'na te na buka e te mau papairaa a Aberahama, e a Mose, no nia mai i te mau parau i iteahia i te fenua ra, i Aiphiti, e tei afaihia'tu ia'na, e taata paari roa e te maramarama rahi oia. Ua ite maitai oia i te mau ohipa na te Atua, e i te haerea no te mau fetia, e hau roa'tu to'na ite i to tatou Metua i te ao ra, i to te mau taata atoa ra o teie nei ao. I teie nei, ua tae te Peropheta i te toru ahuru o to'na ra matahiti, ua haere atura oia i te haapiiraa e haapii i te mau mea e rave rahi, area ua puai ta'na haapiiraa i te re'o no to te ati Iuda.

Ua tarahuhia te hoê taata paari ati Iuda, ia haapii atu i te mau taeae i Ketelani, e no to ratou oioiraa i te haapii, parau atura oia e, no ite a'enei te hoê pŭpŭ taata mai taua pŭpŭ ra i te huru.

E teie nei, ua ite tatou i te hoê tumu maitai i ore ai te Atua i parau i te Feia Mo'a ia haere paatoa ratou i Missouri. Ua faaea atura te tahi pae no ratou i Iaketoni e hoo i te fenua, e haamata i te patu i te oire ra, i Ziona. Aita to ratou parau-tia i au i te hamani-ino-raa o to ratou enemī, e ua tiahi-ê-hia ratou i to ratou fenua, area râ te vai noa ra te hinaaro i roto i to ratou aau ia ho'i faahou atu i reira, e i teie nei te tia i noa nei â te Feia Mo'a i te taime e haapaohia e te Atua, ia haere faahou atu ratou i Iaketoni e faaora i Ziona. Ua hi'o aroha maira te Atua, e parahi atura te tahi pae no ratou i Ketelani e patu i te hiero no te Fatu, e farii i to ratou mau haamaitairaa. I te avae ra, i Tiurai, 1833, ua haamauhia te tihi rahi no te hiero matamehai i te anotau hopea nei, e i te mahana 27 no Mati, 1836, ua haamaitaihia ia e te Peropheta.

I mua i te haamaitairaa i te hiero, ua tupu te mau mea hanahana e rave rahi. I te hoê pô i te pae muri no te avae ra, no Tenuare, ua tairuru atura te Peresideniraa Matamua e te tahi mau Peresibutero no Missouri e no Ketelani, ia faatahinu ratou te tahi i te tahi. Ua na mua Iosepha, e ta'na na tauturu i te faatahinu atu ia Iosepha, tupuna, te patereareha no te Ekalesia e ia oti te reira, na'na i faatahinu atu ia ratou. Aita râ te mau faatahinuraa ana'e tei tupu i roto i te hiero i taua pô i hora; ua iriti te mau melahi i te paruru no te ra'i ra e ua itehia te nahoa rahi, o te parahi i reira, e to tatou Faaora, o Iesu Mesia ra. Arue atura te mau Peresibutero i te Atua, e ua i to ratou aau i te oaoa mau. Ua ite atura te Peropheta, i roto i te tahi mau orama, i te Basileia Tiretiera no te Atua, e i te mau uputa ura, e tae atu i roto i taua basileia ra. Ite atura oia i te terono hanahana i parahihia e te Atua, e te Tamaiti, e ua ite atoa hoi oia, i roto i taua

oire nehenehe roa ra, i taua na metua ra, ia Adumu, e ia Aberahama, e i to'na iho na metua, e i to'na teina ra, ia Alivina, o tei pohe i te tahi mau matahiti i mua'e i te reira.

Ua maere ihora Iosepha i te ite i to'na teina i reira, no te mea ua pohe oia i mua i te faaho'iraa mai i te evanelia, area na faaite papu maira te Fatu ia'na e, o te mau taata pohe, o tei ore i faaroo i te Evanelia i roto i teie nei ao, e ahiri i faaroo ai ratou i taua evanelia ra, ua farii ratou i te reira, e faaorahia ratou i roto i te basileia Tiretiera, o te au i te mahana i te hanahana, ia oti to ratou mau fetii, e aore râ, te tahi atu mau taata i te baptizohia i roto i teie nei ao, no ratou hoi o tei pohe ra. Ua ite tatou e, ite atura te Peropheta i te tau a muri atu, no te mea i taua taima ihora, te ora noa ra to'na na metua, e aita i heheuhia mai te parau no te baptizoraa i te mau taata no te feia i pohe ra, e no reira i te taima, i ite ai Iosepha i to'na teina ra, ia Alivina, aita i noaa ia'na te hanahana Tiretiera, no te mea aita i oti to'na fetii i te baptizohia no'na ra.

Aita i faaotihia taua pureraa hanahana ra ia tae i te hora piti i te poipoi, e i te pô i muri iho, amui faahou maira te mau Peresibutero. Ua amui atoa maira te pūpū ahuru ma piti Aposetolo, e te mau peresideni no te Hitu Ahuru, ia farii ratou i to ratou mau faatahinuraa. Ua tae faahou maira te mau melahi, e amui maira ratou i te mau taeae i te haamaitairaa'tu i te Atua; tae maira te Varua Maitai i nia iho i te mau Peresibutero, e ua parau atura ratou i te parau êê. I te hebedoma i muri a'e i te reira, putuputu atura te mau Tahu'a Rahi, e te mau Hitu Ahuru, e te mau Peresibutero, ia haamaitaihia, e ia faatahinuhia ratou, e hoê â ia huru te mau orama, e te mau tapao hanahana rahi, tei faaitetia maira ia ratou.

I te poipoi roa, i te mahana Sabati, i te 27 no Mati, 1836, te haere atura te Feia Mo'a no Ketelani, e no Missouri atoa hoi, i te hiero no te Fatu. I te hora vau ua iritihia te mau opani, e aroha rima'tura te Peropheta, ratou o Olive Taudere,

e o Sidine Ritidoni i te mau taeae e te mau tuahine, e faaite atura ia ratou i to ratou mau parahiraa. Ia tae i te hora iva ua haamatahia te pureraa, ma te mau himene e te pure, ei reira a'o atura Sidine Ritidoni e te tahi atu mau taeae, e ua fariihia te mau taata toroa no te Ekalesia e te Feia Mo'a mai te tia paatoa. Ua pure atura te Peropheta ra, o Iosepha Semita i te pure haamaitairaa, e ua haamauhia ia te reira e te re'o puai no te Feia Mo'a, i te na ôraa'tu e, "Hosana, hosana, hosana i te Atua e te Arenio. Amene, amene, amene."

I muri a'era i te reira, a'o atura Birikama Youne, raua o Davida Patena i te Feia Mo'a i te parau êê, e ua tohu atura Tihoti A. Semita i te parau, ei reira, ua faaroohia te haruru no te mata'i rahi u'ana ra, e faaea a'era te hoê pou auahi maramarama rahi roa i nia iho i te hiero. Ua î roate fare i te mau melahi, e tia ana'e a'era te Feia Mo'a i nia, e e ua parau atura te tahi pae i te parua êê, tohu atura te tahi pae i te parau, e ite ihora te tahi pae i te mau orama hana-hana rahi roa. Ua faaroo ihora te mau taata, i roto i te oire i te haruru no te mata'i rahi; ite a'era ratou i te pou maramarama, e maere ihora, e haere ana'e atura ratou i te hiero e ite i taua mea ê roa ra. I te hora ahuru ma hoê i te pô, haere atura te Feia Mo'a i to ratou ihora mau fare, e ua oti te haamaitairaa i te hiero matamua no te Fatu i te mau mahana hopea nei.

I te mahana 29 no Mati, tairuru atura te Peropheta, e ta'na na tauturu e te tahi mau Peresibutero i roto i te vahi mo'a no te hiero. Haapae ihora ratou i te maa, e ua pure, e horoi atura ratou i to ratou avae, te tahi i to te tahi, e ao noa'e te rui, ei reira, farerei atura ratou i te mau taata toroa no te Ekalesia, o tei mau i te Autahu'araa o Melehizedeka. Ua haapaohia te oroa horoiraa avae e te mau taeae e hope roa'e e ua horoahia te oroa no te Fatu ia ratou, e faaite atura Iosepha ia ratou i te mau ohipa no te Autahu'araa. I te hora iva i te pô, haere atura Iosepha i to'na ihora

fare e faaea'i, e ua faatere te mau Aposetolo i te pureraa. I roto i taua pô ihora, ua noaa i te tahi te horoa no te parau êê, fâ maira te mau melahi i te tahi, e ua ite ihora te tahi pae no ratou i te Mesia.

I te mahana Sabati i muri iho, oia hoi, i te 3 no Eperera, 1836, a haapaohia'i te pureraa ahiahi i roto i te hiero, opani atura Iosepha, raua o Olive Taudere, i te paruru no te terono, ia ore raua i itehia e te tiaa rahi, e pure atura raua i te Atua. Ia oti ta raua pure e ia tia i nia, ite ihora raua i te Fatu, i te tiaraa i nia iho i te terono, o tei tapo'ihia e te hoê mea, mai te auro mau i te huru. Mai te hiona ia to'na rouru i te teatea; hau roa'tu to'na mata i te anaana i te mahana i te avatea ra; mai te ura auahi ia to'na na mata, e ua puai to'na re'o, mai te haruru no te mau pape rahi ia i te huru. Faaite atura Oia ia raua e, ua farii Oia i te hiero, e faahiti atura Oia i te mau haamaitairaa e rave rahi i nia i te mau tamarii a te taata nei. Ia oti taua orama ra, ua tae maira o Mose, e horoa maira i te mau taviri no te haaputuputuraa o Iseraela; ei reira ua tae maira te Peropheta tahito ra, o Elia o tei reva'tura i nia i te ra'i, na nia i te pereoo auahi, e horoa maira oia ia raua i te mau taviri no te faafariuraa i te aau o te mau metua i te tamarii, e te aau o te tamarii i to ratou mau metua, oia hoi i te mau taviri no te baptizoraa i te mau taata ora no te feia i pohe ra. E na reira ua faaho'ihia maira te mau taviri atoa no te Evanelia mau no te anotau hopea nei e te Atua, i te Peropheta ra, ia Iosepha Semita.

I taua mau mahana oaoa rahi ra, ua noaa i te pŭpŭ ahuru ma piti Aposetolo, e te mau Peresibutero maitatai, to ratou mau faatahinuraa i roto i te hiero, ei reira purara'tura ratou i roto i te ao nei e poro-haere i te Evanelia. Ua haere atoa atura Iosepha, i te tahi na avae i te haaputuputuraa mai i te auhune maitai.

—OLE PETESONA.

(E tuatihia mai teie parau.)

Te Mau Parau Api.

U A mairi i raro te uahu i te anavai rahi ra, o Niagara, e ua pohe roa e 39 taata.

Tei te fenua Inidia te hoê taata roa i te ao atoa nei. E taata apî roa, e 25 to'na matahiti, e 7 avae e 9 initi to'na roa i faitohia.

Na roto i te imiraa paari a te feia maramarama i Farani, ua mana'o ihora ratou, e ere te avae i te mea menemene, e au râ i te huero moa to'na huru.

Ua fanau te hoê moa i te hoê huero, e ua rave te hoê vahine i taua huero ra, e i te taima i tupaihia taua huero ra, itea ihora e, e piti huero i roto i taua huero ra, e e piti atoa hoi paa no taua huero.

Ua apoo te feia moni no te mau hau rarahi, Farani, Amerika, Beritane, Purutia e Rutia, e ua faatia ratou e, e horoa e 300 milioni dala na te Hau Repupirita apî Tinito. Mea tafifi-roa-hia hoi teie nei Hau apî a te Tinito i te tarahu, e no reira ua faatia te mau Hau rarahi. Aore te Hau apî a te Tinito i farii i teie moni.

Ua paiuma te hoê tamaiti, e vau o'na matahiti, i nia i te hoê pou o tei haamauhia te niuniu mori uira, e i te taima oia i tae i nia, ua rave to'na rima i te niuniu e ua pohe roa, e ua mairi oia i raro, e ua fatifati roa to'na tino. E homa e to Tahiti, e ara ia outou. Eiaha outou e rave noa'tu i teie nei niuniu, a roohia-atoa-hia outou e te pohe mai teie nei tamaiti.

I te mahana 20 no Tiurai, i te matahiti 1912, ua fanau a'enei Made, te vahine a Farani Fulumare; toopiti a'na tau tamarii tamaroa, tau maehaa, e ua mairihia te i'oa o te matahiapo o Farani, e te i'oa o te teina o Davida. E mea maitai roa te fanauraa e te tupu nei raua i te rahiraa o to raua tino, e e mea maitai roa to raua metua vahine. I taua ihora mahana i te ahiahi ua fanau Tiulia, te vahine a Ole Petesona, to tatou orometua nenei parau, hoê tamarii tamahine, e ua mairihia to'na i'oa, o Vero. E mea maitai roa atoa to'na fanauraa.

E toru a'e hebedoma i teie nei, ua orurehau te mau taata ereere (Afrika), i te fenua ra i Cuba ma, oia hoi te hoê mau fenua aihuaraau no te Hau Amerika. Aita teie mau taata ereere i mauruuru i te tahi mau ture o tei faaere ia ratou i te ravea ia tuu to ratou parau-maite i te maiteraa o te feia mana. Ua tonu te Hau Amerika i e 2000 faehau i taua fenua ia faahau i teie peapea, e ia paruru i te mau taata Amerika o tei parahi i reira. Aore te Hau Amerika i faatere i teie mau fenua, ua riro râ oia mai te hoê metua faaamu te huru no taua mau fenua. I te taima ua tama'i Poniola raua Amerika, ua riro teie fenua o Cuba ia Amerika, e i muri iho, ua tuu Amerika ia to Cuba ia faatere ratou iho.

Aore roa te Hau Purutia, i Hamoa, i faatia i te papaa Purutia ia faaipoipo i te vahine maohi. E ture apî teie.

Ua upootia te Italia i to ratou aroraa ia Turekia, e ua roaa ia ratou te oire ra o Misrataha. Ua hanere te faehau Turekia i pohe roa, to Italia râ, e 9 noa iho i pohe roa, e e 121 i puta.

Te vai ra te hoê tane e ta'na vahine i te fenua Amerika, e 11 tamarii ta raua i fanau i na matahiti e toro. Tootoru tamarii tei fanauhia hoê â fanauraa i te matahiti matamua. I te piti o te matahiti, ua fanau-faahouhia tootoru tamarii, e i te toru o te matahiti, toopae tamarii tei fanauhia i te mahana hoê.—Maitehia.

Teie te hoê ohipa i faatupuhia e te Hau Amerika. Te opere nei te Hau i te mau ohi ohe i te mau mataeinaa ia iteahia te vahi e tupu ruperupe ai taua raau ra. Te na reira nei taua hau ra i te tauturu i te mau taata i te faaapu i taua raau ra. E te hoo nei to Amerika e 10 milioni aira no taua raau ra, i te matahiti hoê. Tei te fenua Tinito te pae rahi o taua mau aira ra.

Tei Amerika te hoê opu Inidia parauhia Chocktaw. E feia maohi ratou no Amerika, e e fetii hoi no to Tahiti ma. E faufaa rahi roa to teie nei mau taata, e ua mana'ohia e 5,000 dara moni Amerika to te tahi. Tei ia ratou atoa e hoê milioni taa fenua maitai roa, e ia hoohia taua fenua ra, na te Hau e horoa ia ratou te moni. E ere teie nei feia e feia mea rahi roa, ia taiohia ratou hope roa, e riro paha e 23,000 taata.

Na te hoê potii, o Mina Olin to'na io'a, o tei parahi i Utaha, i pupuhi i te hoê daba rahi roa oia hoi te hoê puaa taehae rahi parau-atoa-hia e bea. Ua haere taua potii i te ravaai, e a ori haere ai oia i pihaiiho i te anavai ra, ua farerei raua, ta'na urî, i taua manu taehae. Ua horo oioi taua potii i te fare, e ua tiihia ta'na pupuhi; ho'i oioi atura oia i te vahi i itea te bea, e ia tao atu oia, tei nia te bea i te hoê tumu raau. Ua faatono papu te potii i ta'na pupuhi i te area i ropu i te mata o te bea e ua pupuhi-pohe roa i te bea.

Ua tae mai ia matou te parau matamua no te hoê vea apî i neneihia no to Tahiti. Ua parauhia teie vea apî "La Tiribune De Tahiti". Tei te re'o Farani teie vea apî, teie râ te hoê paeau tei te re'o Tahiti. Ua maururu roa Te Heheuraa Apî i teie vea apî, no te mea e haapao teie vea apî i te mau ohipa maitatai a te pae tino nei, mai te mau ohipa faaapû, te hoo tao'a, te hamani tao'a, e te maitai no te mau taata atoa. E nenei-atoa-hia te pene no te vanilla, e te pâraû, e no te puha atoa hoi, e te mau parau maramarama atoa mai tera ra te huru. Te na ô maira teie vea apî: "Eita oia e faahiti noa" e i te parau no te haapaoraa o te taata nei (mai te Porotetani, te Katorika, te Momoni e te tahi atu â) no te mea na te taata iho e hi'o i te reira." Ua parau atoa mai oia e: "E mau hoa faaherehere e te mâta'u ore no te taata Tahiti, teie nei mau taata e papai nei i teie nei vea."

Ua horomiihia hoê raera, moni Amerika, e te hoê tamaiti, e pae o'na matahiti, e hoê hora i muri iho ua pohe roa taua tamaiti ra.

I te vea no te avae Me, ua papaihia te hoê parau hapa, oia hoi ua parauhia o Mahinui a Temorere ei Peresibutero Tiai no Marokau. Tera mai te tia o Mahinui a Temorere te Peresibutero Tiai no Nihiru, e o Pahoa a Tahiaroa te Peresibutero Tiai no Marokau.

Ua tuuhia a'enei te hoê pahi manuâ i roto i te miti no te Iapone, teie to'na i'oa, o "Kongo". E ua parauhia e, o te pahi teie i hau i te puai i te tere i te mau pahi manuâ o te ao nei. Teie to'na puai, ua au i te 30 maile i te hora hoê. Te moni i pau i taua pahi ra, e piti milioni e te afa. I te tuuraa i taua pahi ra i raro i te miti ra, ua tuu-atoa-hia te tahi mau manu, no roto mai i te tahi opupu i nia roa i te reva. E tapao maitai teie na te Iapone.

I te avae ra Tiurai, ua putuputu i Stockholm i Suiti, te feia puai i te horo, e te ou'a, e te au, e te hahaereraa. Ua parauhia teie te arearea Olympic. No te mau fenua atoa teie mau taata; te tahi pae no Farani, e te tahi pae no Beritane, e te tahi pae no Purutia, e te tahi pae no Suiti, e tahi pae no Italia, e tahi pae no Amerika, e tahi pae no Canada, e tahi pae no tahi atu â mau fenua. Mea arearea rahi roa teie haaputuputuraa. Na te hoê vahine no Ausarelia i roa te rê matamua no te auraa vahine; e 100 metera te maoro no taua faatitiauraraa ra, e te taime i pau, e 1 minute e 20 tetoni. Na te hoê tane no Ausarelia te rê matamua no te auraa tane; na te hoê taata Beritane te rê piti. E 400 metera te atea no taua faatitiauraraa, e te taime i pau, e 5 minute e 36 tetoni. I te hororaa roaroa ua pohe roa te hoê taata, ua oti taua taata ra e 19 maile i te horohia, e i reira no te pao-pao o to'na aho e no te puai o te mahana, ua mairi oia i raro e ua pohe roa. Ua mairi atoa te tahi mau taata i taua faatitiaua, e tei roto ratou i te fare ma'i i teie nei. Mea rahi te mau ohipa puai e te maere rahi i ravehia i taua putuputuraa ra; e i te parau apî hopea tei tae mai ia matou, tei mua roa to Amerika, oia hoi tei to Amerika te rahi o te mau rê, tei to Suiti te piti, e o Beritane te toru. I te ou'a teitei ua roa te rê matamua i te hoê taata no Utaha no roto mai oia i te haapiiraa a te Ekalesia, e e taeae oia no matou. Tera mai te faito o to'na ou'a, oia hoi e 163 cenitimetara, oia hoi i nia rii a'e te reira i e 6 avae e 4 initi te teitei.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.